

VENDIM
Nr. 114, datë 22.7.2019

**MBI LICENCIMIN E SHOQËRISË “SPE GJADËR” SHPK, NË VEPRIMTARINË E
PRODHIMIT TË ENERGJISË ELEKTRIKE NGA HEC “GJADËR NR. 1/1” ME
KAPACITET TË INSTALUAR 2134 kw, HEC “GJADËR NR. 1/2” ME KAPACITET TË
INSTALUAR 4406 kw, HEC “GJADËR NR. 2” ME KAPACITET TË INSTALUAR 2983
kw, HEC “GJADËR NR. 3”, ME KAPACITET TË INSTALUAR 3874 kw,
HEC “GJADËR NR. 4” ME KAPACITET TË INSTALUAR 5922 kw, HEC “GJADËR
NR. 5” ME KAPACITET TË INSTALUAR 5619 kw, ME KAPACITET TOTAL TË
INSTALUAR 24938 kw**

(Ndryshuar me vendimin nr. 47, datë 11.2.2021)

(I përditësuar)

Në mbështetje të nenit 16 dhe nenit 37, pika 2, germa “a”, të ligjit Nr. 43/2015 “Për sektorin e energjisë elektrike” i ndryshuar, si dhe nenit 4, pika 1, germa “a”, nenit 5, pika 1, germa “a” dhe nenit 13 të “Rregullores për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike”, të miratuar me vendimin e bordit të ERE-s nr. 109, datë 29.6.2016, si dhe nenit 15 të “Rregullores së organizimit, funksionimit dhe procedurave të ERE-s”, miratuar me vendimin e bordit të ERE-s nr. 96, datë 17.6.2016, bordi i Entit Rregullator të Energjisë (ERE), në mbledhjen e tij të datës 21.6.2019, mbasi shqyrtoi aplikimin e paraqitur nga shoqëria “SPE GJADËR” sh.p.k, si dhe relacionin e Drejtorisë së Licencimit dhe Autorizimeve dhe Mbikqyrjes për shqyrtimin e aplikimit të shoqërisë “SPE Gjadër” sh.p.k, për licencim në veprimtarinë e prodhimit të energjisë elektrike, të kësaj shoqërie, nga HEC “Gjadër nr. 1/1” me kapacitet të instaluar 2134 kw, HEC “Gjadër nr. 1/2” me kapacitet të instaluar 4406 kw, HEC “Gjadër nr. 2” me kapacitet të instaluar 2983 kw, HEC “Gjadër nr. 3”, me kapacitet të instaluar 3874 kw, HEC “Gjadër nr. 4” me kapacitet të instaluar 5922 kw, HEC “Gjadër nr. 5” me kapacitet të instaluar 5619 kw, me kapacitet total të instaluar 24938 kw,

konstatoi se:

- Bordi i ERE-s, me vendimin nr. 48, datë 27.3.2019, filloi procedurën për licencimin e shoqërisë “SPE Gjadër” sh.p.k, në veprimtarinë e prodhimit të energjisë elektrike nga: “HEC Gjadër nr.1/1” me kapacitet të instaluar 2134 kw, “HEC Gjadër nr. 1/2” me kapacitet të instaluar 4406 kw, “HEC Gjadër nr. 2” me kapacitet të instaluar 2983 kw, “HEC Gjadër nr. 3” me kapacitet të instaluar 3874 kw, “HEC Gjadër nr. 4” me kapacitet të instaluar 5922 kw, “HEC Gjadër nr. 5” me kapacitet të instaluar 5619 kw me kapacitet të instaluar total 24938 kw, për një afat 30-vjeçar.

- Në vijim të kësaj vendimmarrje, ERE, me shkresën nr. 32/11 prot., datë 27.3.2019, ka kryer njoftimin në median e shkruar për fillimin e kësaj procedure.

- Në përfundim të afatit të përcaktuar në nenin 10, pika 11, të “Rregullores për procedurat dhe afatet për dhënien, modifikimin, transferimin, rinovimin dhe heqjen e licencave në sektorin e energjisë elektrike”, të miratuar me vendimin e bordit të ERE-s, nr. 109, datë 29.6.2016, nuk rezulton të ketë vërejtje apo ankesë nga palët e treta, lidhur me aplikimin e bërë nga shoqëria “SPE Gjadër” sh.p.k. për licencim në veprimtarinë e prodhimit të energjisë elektrike.

- ERE, me shkresën nr. 195/1 prot, datë 27.3.2019, ka përcjellë pranë shoqërisë kërkesën për plotësim të dokumentacionit të munguar, i cili konsiston si më poshtë:

- Dokumentacioni juridik, administrativ dhe pronësor (neni 9, pika 2):

- germa “d” (vërtetimi nga Prokuroria dhe Gjykata për përfshirje ose jo në një proces penal të drejtuesve të shoqërisë),

- germa “e” (struktura e ndërtimit të shoqërisë, lista e personelit sipas profilit (në përputhje me aktivitetin për të cilin kërkohet licenca),

- germa “g” (dokumente që vërtetojnë pronësinë e aplikuesit në zonat ku do të shtrihet projekti (kontrata shit-blerje, kontrata qiraje, akte dhurimi, kontrata premtim shitblerje, marrëveshje me subjektet që kanë në pronësi zonat ku shtrihet projekti);

- neni 9, pika 3, germa “c” (dokumente që vërtetojnë aftësinë ose mbështetjen financiare të aplikuesit);

- Dokumentacioni teknik dhe grafik (neni 9, pika 4.1.3):

- germa “c”: shtrirja gjeografike e vendit ku do të ngrihet apo zhvillohet veprimtaria duke dhënë referencat ekzakte (numër parcele, numër regjistri kadastre) dhe të paraqitura në hartë me shkallë 1:25000.

- Shoqëria “SPE Gjadër” sh.p.k, me shkresën e protokolluar në ERE me nr. 195/2 prot, datë 18.4.2019, ka përcjellë një pjesë të dokumentacionit të munguar dhe në këto kushte, ERE-ja me shkresat nr. 195/3 prot, datë 6.5.2019 dhe nr. 195/5 prot, datë 27.5.2019, ka vijuar kërkesat për plotësim dokumentacioni. Shoqëria “SPE Gjadër” sh.p.k, ka plotësuar dokumentacionin e mbetur me shkresat nr. 195/4 prot., datë 16.5.2019 dhe nr. 195/6 prot, datë 31.5.2019.

- Shoqëria ka paraqitur në ERE, raportin e Oponencës Teknike nr. 5476 prot, datë 20.5.2015, mbi projektin e zbatimit të HEC “Gjadër”.

- Shoqëria ka depozituar në ERE, shkresën e ZVRPP Lezhë me nr. 5184/1 prot, datë 24.11.2015, e cila njofton shoqërinë se është regjistruar kontrata e koncesionit në pasuritë e listuara në këtë shkresë sipas numrave përkatës të pasurive, përveç pasurisë me nr. 33/9 vol 1, faqe 46, me sipërfaqe 5350 m², me emërtesë “arë”, e cila nuk preket nga vepra. Numrat e pasurisë janë të shoqëruara me kartelat e pasurisë me përshkrimin në referencë të kontratave të koncesionit.

- Shoqëria ka paraqitur lejen e përdorimit uJOR, referuar shkresës së Sekretariatit Teknik të Këshillit Kombëtar të Ujit nr. 549 prot., datë 1.11.2016.

- Pas shqyrtimit në mbledhjen e bordit të ERE-s, të datës 21.6.2019, u ngritën pyetje e u lanë detyra për sqarime në lidhje me lejen e ndërtimit të lëshuar me vendimin e KKT-së me nr. 9, datë 9.9.2015, statusin e ndërtimit të veprave prodhuese, si dhe deklaratës së shoqërisë në lidhje me kërkesën që do të adresojë pranë Ministrisë së Infrastrukturës dhe Energjisë (MIE) për zgjatjen e afatit të kontratës, pas zbardhjes së lejes së ndërtimit nga AZHT-ja.

- ERE më shkresën nr. 195/7 Prot., datë 25.06.2019, dërgoi pranë shoqërisë njoftimin për zhvillimin e një seance dëgjimore për të sqaruar sa më sipër.

- Në seancën dëgjimore të datës 28.6.2019, përfaqësuesi i shoqërisë sqaroi në lidhje me çështjet që lidheshin më plotësimin e kushteve të parashikuara në kontratën e koncesionit si më poshtë:

- Kontrata e Koncesionit bazë me nr.10328 rep, nr. 3322 kol, e nënshkruar më datë 9.9.2013 në nenin 10 të saj, pika 10.1, parashikon se: “Koncesionari merr përsipër të fillojë punimet për zbatimin e projektit brenda 30 ditëve nga data e lëshimit të lejes së ndërtimit. Aplikimi për pajisjen me leje ndërtimi do të kryhet brenda 30 ditëve nga data e miratimit të projektzbatimit përfundimtar nga Autoriteti kontraktues. Pika 10.2: Koncesionari merr përsipër të vërë në punë hidrocentralin brenda 18 muajve nga data e marrjes së lejes zhvillimore komplekse. Afati për pajisjen me lejen e nevojshme është jo me shumë se 18 muaj nga data e hyrjes në fuqi të kontratës së Koncesionit siç është parashikuar në dokumentet standarde të garës. Afati i punimeve është parashikuar në grafikonin e punimeve në aneksin 2, bashkëlidhur. Pika 10.3: këto afate do të ndryshohen me marrëveshje midis Autoritetit Kontraktor dhe Koncesionarit nëse marrja e lejeve nga institucionet përkatëse është vonuar përtej kohës së rregullt procedurale për marrjen e tyre. Koha e shtyrjes do të jetë sa koha e vonësës të krijuar nga subjektet shtetërore.

- Me kontratën nr. 328 rep, nr. 176 kol, datë 17.6.2015 është miratuar kontrata shitesë e koncesionit.

- Shoqëria në zbatim të nenit 10, të Kontratës së Koncesionit, ka vijuar me aplikimin për lejen e ndërtimit e cila i është miratuar me vendimin nr. 9, datë 9.9.2015. ku në pikën 2 të kësaj leje të vendimit të KKT-së përcaktohet se: “Kusht për miratimin e lejes së ndërtimit, është pajisja me vendimin e Këshillit të Basenit Ujor për përdorimin e burimeve ujore”.

- Shoqëria me tej është pajisur me Lejen e Ujit nga KKU-ja, me vendimin me nr. 14, datë 26.10.2016 dhe ka vijuar me depozitimin e saj në KKT.

- Shoqërisë i është kërkuar të riaplikojë pranë Agjencisë së Zhvillimit të Territorit, nëpërmjet platformës elektronike në zbatim të legjislacionit në fuqi, dhe siç dokumentohet në datë 12.5.2019, është kryer aplikimi nëpërmjet kësaj platforme duke kërkuar lëshimin e lejes së zbardhur të ndërtimit.

- Me zbardhjen e lejes së ndërtimit do të fillojnë dhe punimet e veprës, të cilat parashikohen të përfundojnë deri në fund të vitit 2019, pasi shoqëria ka siguruar të gjithë bazën materiale, si dhe pajisjet teknike.

Deri në fund të vitit 2019 parashikohet të ndërtohen dhe të vihen në punë 3 HEC-e.

- Aplikimi i shoqërisë “SPE Gjadër” sh.p.k, plotëson përgjithësisht kërkesat e parashikuara nga ERE-ja në “Rregulloren për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike” si më poshtë:

- Format i aplikimit (neni 9, pika 1, germat: “a”, “b”, “c”) është plotësuar në mënyrë korrekte;

- Dokumentacioni juridik, administrativ dhe pronësor (neni 9, pika 2, germat: “a”, “b”, “c”, “d”, “e”, “f” dhe “g”) është plotësuar në mënyrë korrekte;

- Dokumentacioni financiar dhe fiskal (neni 9, pika 3, germat: “a”, “b”, “c” dhe “d”) është plotësuar në mënyrë korrekte;

- Dokumentacioni teknik (neni 9, pika 4.1.1, pika 4.1.2, pika 4.1.3, germat “a”, “b”, “c”, “d”; pika 4.1.4, germat “a”, “b”, “c”, “d”, “e”; pika 4.1.5, germat “a”, “b”, “c”) është plotësuar në mënyrë korrekte.

- Kontrata e Koncesionit e formës BOT, e lidhur midis METE-s (sot MIE) dhe Bashkimit të Shoqërive “Ani” sh.p.k, “Rafaelo 2002” sh.a, “Junik” sh.p.k, “Vllaznimi” sh.p.k, “SPE Energy” sh.p.k dhe “EUES Energy” sh.p.k, ka një afat 35-vjeçar, që fillon nga data 9.9.2013. Shoqëria ka aplikuar në ERE për pajisje me licencë në veprimtarinë e prodhimit të energjisë elektrike në datën 28.2.2019. Nga analiza e afateve të llogaritura sipas kontratës së koncesionit dhe periudhës 30-vjeçare që ERE lëshon një licencë në zbatim të nenit 38, të ligjit “Për sektorin e energjisë elektrike”, i ndryshuar dhe nenit 5, të “Rregullores për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike”, rezulton se nga koha e nënshkrimit kanë kaluar 5 vjet e 10 muaj. Në këto kushte, ERE-ja mund të lëshojë një licencë për një afat deri në 29 vjet e 2 muaj për këtë shoqëri, në përputhje me periudhën e mbetur të koncesionit.

Për gjithë sa më sipër cituar, bordi i ERE-s,

VENDOSI:

1. Të licencojë shoqërinë “SPE Gjadër” sh.p.k. në veprimtarinë e prodhimit të energjisë elektrike nga: “HEC Gjadër nr. 1/1” me kapacitet të instaluar 2134 kW, “HEC Gjadër nr. 1/2” me kapacitet të instaluar 4406 kW, “HEC Gjadër nr. 2” me kapacitet të instaluar 2983 kW, “HEC Gjadër nr. 3” me kapacitet të instaluar 3874 kW, “HEC Gjadër nr. 4” me kapacitet të instaluar 5922 kW, “HEC Gjadër nr. 5” me kapacitet të instaluar 5619 kW; me kapacitet të instaluar total 24938 kW, për një afat 29 vjet e 2 muaj.

2. Në çdo rast që Autoriteti Kontraktor do të shprehet me vendim për shtyrje të afatit të ndërtimit dhe vënies në punë të veprës, shoqëria “SPE Gjadër” sh.p.k, t’i drejtohet ERE-s për miratimin e ndryshimeve që do të prodhojë kontrata shtesë e koncesionit.

3. Drejtoria e Licencimit, Autorizimeve dhe Mbikëqyrjes, të njoftojë aplikuesin për vendimin e bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti